

Mengenali kelebihan Melayu

Oleh KHAIROL ANUAR MASUAN

um-6/4/2007

KITA pasti teruja untuk melihat kejayaan Arrifin Abdul Aziz menjadi pelayar kedua mengelilingi dunia. Bekas anggota Tentera Laut DiRaja Malaysia ini sedang berusaha gigih untuk mencapai impiannya. Namun, apa yang lebih menarik ialah kecekalan beliau untuk mengharungi lautan itu nanti. Penulis ingin juga mengimbas kembali siapakah orang Melayu di kaca mata ahli akademik Barat.

Pernah suatu ketika penulis berbincang hebat tentang orang Melayu dengan seorang sejarawan dari Poland iaitu Prof. Dr. Ataulloh Bogdan Kopanski.

Prof. Kopanski ada mengatakan pernah suatu ketika dia melihat orang Melayu seperti 'layu'. Nampak seperti tidak bertindak apa-apa bila berdebat atau ingin menyatakan sesuatu. Berbanding dengan orang lain, kita jauh terlalu lembut atau 'layu'. Pada pandangan penulis mungkin ada benarnya.

Namun setelah berada lama di Malaysia baru-lah Prof. Kopanski faham siapa orang Melayu. Rupa-rupanya orang Melayu sangat tidak suka berdebat dan bercakaran. Kalau suasana agak 'panas' maka akan dicari aktiviti supaya terlupa sekejap, contohnya makan atau minum dulu. Ini satu kelebihan yang sungguh dalam sehingga ke peringkat budaya. Soalnya sekarang mengapakah kita tidak melihat ini sebagai satu kelebihan kita? Sungguh malang apabila sudahlah kita dibodoh-bodohkan oleh penjajah tetapi lebih malang jika kita sendiri tidak kenal diri kita.

Berbalik kepada soal pelayaran tadi, seorang pengkaji orang Melayu John Tiffany dalam artikelnya bertajuk "*The Malays-A People of Fascinating Divisions.*" Pengarang artikel ini merujuk orang Melayu sebagai "*The Viking of the Orient.*" Orang Melayu dikenali sebagai pembina kapal laut, pelayar yang hebat, berenang bagaikan ikan di air, dan merentasi separuh dunia sebelum penjajah menemui mereka.

Lebih mengagumkan pengarang mengatakan orang Melayu menganggap lautan itu tempat bermain sedangkan orang putih cukup takut dengan laut. Orang Melayu juga dianggap pelayar teragung dan juga pedagang.

Namun sebagai ahli psikologi penulis amat tertarik apabila dikatakan orang Melayu mempunyai seni pelayaran yang dipanggil "*psycho-navigation.*" Ia boleh dianggap sebagai deria keenam orang Melayu yang tidak dimiliki bangsa lain di dunia. *Psycho-navigation* bermaksud orang Melayu boleh bersampan dari satu pulau ke pulau lain tanpa alat bantuan pelayaran. Namun mereka boleh berbuat sebegitu seperti halnya memandu di lebuhraya. Orang Melayu dikenali boleh membina kapal laut, perahu, dan juga sampan tanpa menggunakan pelan.

Segala binaan perahu itu juga menggunakan apa yang penulis istilahkan *psycho-shipbuilding*. Bagaimanakah kecerdikan ini boleh terjadi? Marilah kita sama-sama menggali kembali kehebatan kita. Semoga kita dapat menemuinya dan pelayaran Arrifin adalah salah satu daripadanya. Semoga berjaya.